

# «Curt avant ch'ir a Berna hai jau vis in tschierv»

Da las pitgiras d'in politicher che fiss il settember pli gugent en ils auts

DA CLAUDIA CADRUVI / ANR

■ **Entant che ses collegas van a chatscha en Val Susauna sesa Duri Campell en il parlament e taidla debattas. Questa fin d'emna po el anc ir intgins dis a chatscha. Ils ultims dis sajan adina ils megliers, tradescha el en la Wandelhalle ed explitgescha tge ch'el resenta sch'el sajetta.** «Oz è in bun di», di il cusseglier naziunal. Igl è gievgia avantmezdi ed il politicher spetga vess sin las votaziuns en il cussegl naziunal. Sco che lezzas èn passadas sbriga el a la staziun. Sch'el clappa il tren da l'ina, arriva el vers las tschintg a chasa. Là mida el mundura – schluppet e satgados èn prontos dapi il glindesdi. Anc in tschit en stalla sche tut è en urden cun vargas e vaders e lura vai cun velo en Val Susauna. Circa 45 minutas sto el pedalar fin ch'el arriva en l'Alp Pignaint. La chamona n'è per fortuna betg fraida. Ses trais collegas èn là durant tut il temp da chatscha ed han stgaurà pigna.



**N'han Voss collegas betg gia sajettà tut?**

**Duri Campell:** (sto rir): Na, na. I n'è betg uschè nausch. Jau vom gugent pir l'ultim'emna a chatscha. Lura èsi pli calm. Sch'ins va a chatscha da camutschs han ils auters chatschadurs gia lur butin e na van betg pli per las muntognas. Las bestgas èn bier pli calmas ed ins è quasi sulet. Igl è tut in auter ir a chatscha.

**Lura pudais Vos anc giudair l'ultim'emna?**

Il proxim venderdi è la chatscha terminada.

**Quai è gist l'ultim di da sessiun! Vos stuais turnar il glindesdi a Berna e manchentais quest'onni pia la davos'emna. Faschais vess?**

Il glindesdi passà èsi stà «dür». Quel di suenter la pausa da chatscha è adina in bun di. La dumengia saira sun jau i en chamona – lura dastgan ins ir cun auto – pertge jau saveva ch'jau pos ir il glindesdi fin las diesch a chatscha ed arriv suentermezdi anc ad uras en il cussegl naziunal. Da las nov sun jau turnà dal post e nus avain mangià ensemen collaziun. Avant che ir hai jau spievlà enturn, uschè per dar adia. E lura hai jau vis in tschierv. Jau hai ditg a mes collegas, il tschierv è là en la «zuondra» e sun partì a Berna. La saira m'han els tarmess la fotografia. Els han schluppè in «se-ser», in giuven taur.

**Essas stà trumpà?**

Na, sch'ils collegas pon schluppètar in taur è quai bun. Uschia è la chat-

scha. Quest onn n'hai jau anc schluppètà nagut. L'onni passà èsi stà sumegliant: Avant che ir a la sessiun a Berna avev'jau fatg la chaurachamutsch e durant l'ultima fin d'emna da chatscha hai jau schluppètà il buc. Lezza saira vulev'jau insè ir a chasa, jau era gea cuntentischem, ma avant che partir sun jau anc svelto i sin in post ed hai anc ina giada schluppètà in taur. Perquai sun jau segir ch'i gartegia era questa fin d'emna.

**Sche Vos essas en il parlament durant quest temp, pensais Vos lura: «Sch'jau fiss po en ils auts!»?**

I dat schon tals muments, cunzunt sch'igl è fina bell'aura u la saira sch'i vegn stgir. Lura pens jau a la cumpa-

gnia en l'alp: cuschinar ensemen, mangiar ensemen e raquintar istorgias.

**Tge manca il pli fitg sche Vos na pudais betg ir a chatscha?**

La chatscha è per mai in mument da reflexiun. La saira vas sin il post ed i vegn adina pli «s-chür». Quai èn buns muments. Igl è schon la tensiun, ma er il mument ch'i vegn bunas ideas.

**I na va betg mo per sajettar.**

Jau na crai betg che biers chatschadurs van mo per schluppètar. Ils muments ruassavels èn pli impurtants. Era la sanadad: chaminar, suar, far pausa, puspè ir. Lura l'emoziun e l'adrenalin sch'i vegn ina bestga e tut questas ponderaziuns: È'la buna? Nun è la buna? Me-

mia dalunsch, betg memia dalunsch? Stos jau ir pli dasper? Hai crappa, co va il vent, ma ves'la? Èsi in auter chatschader che vesa era questa bestga?

**Ed il mument da sajettar?**

I dat ina tensiun fitg fitg speziala. Quel mument ch'ins decida, uss tir'jau, datti adina in mumentin da stress. Jau hai gia discurrì cun auters chatschadurs ed els raquintan il medem. En quest mument han ins l'impressiun che la bestga sco bada insatge, ella vegn er in pau gnervusa. Era sch'ins ha observà in chamutsch in'ura, ed ins prenda il schluppet en maun, lura vegn quest mument ch'ins senta, uss stoi ir svelto. Jau na sai betg sche quai è mo en il chau dal chatschadur u sche la bestga bada propi. Il davos vai simplamain svelto ed uschia èsi tar tuttas trais bestgas. Sco sche la bestga sentiss ch'ins prenda il schluppet.

**E la preda?**

Cura ch'ins stat sper ina bestga morta, gist ina ch'ins ha persequità l'entir di, pensan ins: Argnamain pudessas ti uss puspè star si ed ir. A mai va quai anc savens atras il chau e biers auters chatscheders resentan er uschia. Igl è plitost la sfida: Pos jau traplar quest animal cun ses buns eglis e ses bun nas? Ma suenter pudess el era puspè star si ed ir.

**Ma la charn na rufidais segir betg?**

(El ri) Sa chapescha. Ansant ha cusseglier naziunal *Corrado Pardini* gist empustà in fio-chavriel. Jau al hai empermess da purtar in fio sch'jau schluppètar in chavriel. Sch'i gartegia, stos jau telefonar e lura organischa el che sia mamma vegn a cuschinar. In fio da chavriel dat ina tschavera per circa quatter u tschintg persunas. I fiss l'emprima giada ch'jau vegn cun charnselvaschina a Berna.